

نيران صديقة

إخراج
خالد مرعي

تأليف
محمد أمين راضي

دوامة الحياة فيها قلبي تاه
ليه كل واحد فينا ماشي في اتجاه

ذكر يا اااااااااا
عشنا فيها دوبنا فيها م العذاب
ذكر يا اااااااااا
من ماضينا دوبنا فيها ليل سراب
ذكر يا اااااااااا

في الطريق
كثير مشينا وانتسينا في الطريق
وانتهينا ماعدش فينا شيء بريء

ذكر يا اااااااااا
عشنا فيها دوبنا فيها م العذاب
ذكر يا اااااااااا
من ماضينا دوبنا فيها ليل سراب
ذكر يا اااااااااا

في الطريق
قلوب بريئة قلوب غريفة في الطريق
والحقيق مش حقيقة في كل شيء

ذكر يا اااااااااا
عشنا فيها دوبنا فيها م العذاب
ذكر يا اااااااااا
من ماضينا دوبنا فيها ليل سراب
ذكر يا اااااااااا

عمرو دياب

الشعلة الأولى

بعدت ليه ؟

٢٠٠٩

{بسم الله الرحمن الرحيم}

ليل-داخلي

مشهد ١

منزل نهال - الصلاة - الحمام - غرفة نوم رنا

نرى منزل يبدو عليه الحادثة في الديكور ويكتب على الشاشة يونيو ٢٠٠٩

تخرج نهال سماحة من احد الغرف - امرأة في منتصف الثلاثينات يبدو عليها الصرامة ولكن يعتلي وجهها القلق الشديد ويبدو انها تبحث عن شيء ما فتتجه بسرعة الى باب الحمام وتطرق عليه فلا يأتيها رد فتفتح الباب لتتظر بداخله فتجده فارغا فتعود لتقف في الصلاة وتفكر قليلا ثم تتجه الى باب غرفة رنا المفتوح مسبقا وتدخل الغرفة وتقف تنظر الى انحاء الغرفة حتى تقع عينيها على حاسب الي محمول ويبدو انه يعمل فتتج ه اليه تفتحه لتجد صورة نور توفيق مفتوحة على سطح المكتب

قطع

نهار-داخلي

مشهد ٢

مكتب منتج

تجلس نور توفيق - امرأة في غاية الجمال في منتصف الثلاثينات وان كان الزمن لم يبدأ ف وضع لمساته على جبهة - امام كريم رزق رجل خمسيني يبدو عليه الوقار

يبدو على نور الاحباط الشديد

نور :

تلفزيون تاني يا كريم ؟

كريم :

خلينا واقعين يا نور .. انتي بتبيعي كويس قوي في التلفزيون .. لكن اخر فيلمين ما جابوش حتى نص حقهم

تتنهد نور بضيق

نور :

طيب على الاقل هاتلي ورق من عكاشة .. انا زهقت من المسلسلات اللي بعملها دي

كريم :

هنشوف يا نور .. بس هدي اعصابك

تنهض نور تأخذ نفسا عميقا

نور :

انا هروح .. ابقى كلمني

قطع

مشهد ٣

نهار-داخلي

منزل نور - الصالة

تدخل نور الى شقتها الفاخرة وهي ممسكة ببعض المجلات والاطرف في يدها وترمي حقيبتها وتقلب في الاطرف حتى تقع عينيها على ظرف كتب عليه anniversary فتتظر له باستغراب شديد

قطع

مشهد ٤

ليل-داخلي

منزل نهال- غرفة نوم رنا

تضرب نهال على زر المسافة على الحاسب الالى فتتغير الصورة الى صورة مدحت محفوظة

قطع

مشهد ٥

نهار-داخلي

مباحث الآداب - مكتب مدحت

يجلس رجل يرتدي جلباب ابيض وغترة خليجي على رأسه أمام مكتب مدحت- رجل في نهاية الثلاثينات- الذي وقف أمام فتاة ترتدي ملابس خليعة وخلفها وقف مخبران

بهدوء

مدحت :

المحفظة فيها حاجة ناقصة يا باشا

الوجل :

لا كلوو تمام

بهدوء

مدحت :

قفل المحضر يا ابني

قطع

مشهد ٦

نهار-خارجي

سيارة مدحت

يدخل مدحت الى السيارة ويدير الكاسيت ليخرج صوت عمرو دياب يغني قائلا " بعدت ليه خلتنني اخسر احلى حاجة في دنيتي " فيلمح مدحت ظرف وضع تحت المساحات فينزل من السيارة ليلتقطه فيجده مكتوب عليه anniversary فيستغرب فيفتحه فيجد استغرابه

قطع

مشهد ٧

ليل-داخلي

منزل نهال- غرفة نوم رنا

تضرب نهال على زر المسافة على الحاسب الالى فتتغير الصورة الى صورة طارق يحي

قطع

مشهد ٨

نهار-داخلي

محطة فضائية - مكتب المدير

يجلس طارق يحي - رجل اربعيني يبدو شديد الوسامة وبشوش الوجه رغم نظره للمدير بغضب

طارق :

انا بطلع اقول قال الله وقال الرسول .. مش
هطلع اتكلم عن الوصلات واقول انها حلال
وحرام دي حاجة ما تخصريش

المدير :

بس في سياسة محطة كلنا ملتزمين بيها

وهو ينهض

طارق :

اقرا عقدي كويس .. وابقى كلمني بعدها

قطع

مشهد ٩

نهار-داخلي

محطة فضائية - غرفة المكياج

يجلس طارق على كرسي المكياج امام المرأة ينظر الى نفسه بضيق فيطرق احدهم على الباب

طارق :

ادخل

يدخل احدهم الى الغرفة ويتجه الى طارق ويناوله ظرف

الرجل :

ده جه لحضرتك يا افتندم

ياخذ طارق الظرف المكتوب عليه anniversary وينظر له باستغراب

قطع

مشهد ١٠

ليل-داخلي

منزل نهال- غرفة نوم رنا

تضرب نهال على زر المسافة على الحاسب الالى فتتغير الصورة الى صورة تجمع كل من اميرة حشمت رأفت فريد هجرس

قطع

مشهد ١١

نهار-داخلي

فيلا رأفت - غرفة اميرة

يجلس رأفت - رجل اربعيني - على كرسي متحرك بعجل ويبدو مشلولاً امام اميرة - امرأة في منتصف الثلاثينات يبدو عليها العملية بشدة في مظهرها

رأفت :

انا قولتلك هنجيب عمرو دياب

اميرة :

وانا قولتلك هنجيب تامر حسني . وللا هو عند السلام

رأفت :

انتي اللي بتعندي .. احنا كل سنة بنجيب عمرو .. ايه اللي جد

اميرة :

اللي جد اني بقيت بحب تامر اكثر

رافت :

يبقى تجبيه في عيد ميلادك .. لكن ده عيد جوازنا لو مش هنتفق على اللي عايزينه .. يبقى بلاش خالص

اميرة :

بلاش خالص

قطع

مشهد ١٢

ليل-داخلي

منزل نهال- غرفة نوم رنا

تضرب نهال على زر المسافة على الحاسب الالى فتتغير الصورة الى صورة تجمع كل من اميرة حشمت رأفت عبد المجيد و طارق يحيى و نور توفيق و مدحت محفوظ و نهال سلامة وهم اصغر سناً وتبدو الصور قديمة ويبدو عليهم السعاً دة والحب وهم ينظرون الى الكاميرا بينما يحاول كل منهم ان يضع قرون للآخر

يبدو على نهال الانهيار وتضع يدها على فمها ثم تغلق الحاسب وتحول ان تنظم نفسها

قطع

ليل داخلي

بداية الفلاش باك

مشهد ١٣

فيلا رافت - الهول

نرى فيلا رافت وقد بدا ديكورها ديكور الثامنينات ويكتب على الشاشة فبراير ١٩٨٦ ونسمع في الخلفية في الصوت عمرو دياب ينهي اغنية هلا هلا قائلة " يا اغي حاجة لينا .. هلا هلا .. رديتوا روحنا فينا .. ده البعد عنكم نار والفرقة باستمرار .. الرحمة يا اهل الدار .. واحشنا والله يا امه " ونسمع تصفيق لنرى بعد ذلك كل من مدحت يجلس على الارض يدخل سيجارة بينما يمدد طارق جسده على كنبه الانترية وفي الكنبه الاخرى تجلس نور التي رغم صغر سنها الواضح الا انها ترتدي ملابس تجعلها مثيرة للغاية بينما تجلس بجوارها اميرة وقد بدت رقيقه للغاية كالفرشات بينما تدخل نهال حاملة زجاجات كوكاكولا قديمة الشكل

نهال :

هلا هلا

تنتهي الاغنية فينهض مدحت ليتناول من نهال الزجاجات لتبدأ اغنية اخرى لعمرو دياب تقول " يصعب علينا تبعدوا وتنسوننا باللي بحنان الحب عودتنا " فيصمت الجميع ويستمعون الى الاغنية ثم ينظر طارق الى اميرة

طارق :

مممكن يجي يوم علينا ننسى بعض ؟

اميرة :

وايه اللي هيخلينا ننسى بعض ؟؟؟ ما احنا مع بعض في نفس الجامعه .. ومدحت ما هو اتخرج من سنتين تلاتة ولسه معانا .. وراففت ما اهو اكبر منا بحبة حلوين .. ومش ناسينا

طارق :

ما بقولش على دلوقتي يا اميرة .. بقولك على بعدين

نور :

خلي بعدين لبعدين يا سي طارق .. واقفلوا الاغنية دي .. عشان مزاج طارق النهارده اكتب

تغلق نهال الكاسيت وتقترب من طارق

نهال :

اغنيك ايه يا طارق عشان تفرش

تطرق باظافرها على ركبته

نهال :
في كل حي ولد عترة وصبيا حنان .. وكلنا
جيرة وعشرة واهل وخلان

يردد الجميع الكوبليه ويبدون في التصفيق فتشده نهال من يده وتبدأ في الرقص معه بينما يصفق
الجميع لهم فيضحك طارق بينما ينظر مدحت بشيء من الضيق الى نهال وتبتسم اميرة ابتسامة
رفيعة عند رؤيتها لطارق يضحك بينما تنهض نور وتبدأ في الرقص بمياعة
يفتح رأفت الباب الخارجي للفيلا ويدخل ومعه لفافة ضخمة ويتجه بها اليهم

رأفت :
انا جيت

فيتجه الى اميرة ويمسك يدها ويقبل كفها برقة

مدحت :
كنت فين كل ده ؟

رأفت :
آخر مرة روحت ايطاليا شوفت في الفاتيكان
حاجة تهوس .. دوخت عليها ما عرفتش
اجيبها وصيت عليها .. لغاية ما جت النهارده

اميرة :
ده ايه ده

يقطع رأفت اللفافة فيظهر من تحتها كتاب ضخم ذو جلد سميك واوراقه من الجلد الرفيع

قطع

ليل داخلي

مشهد ١٤

فيلا رأفت - غرفة المكتب

غرفة المكتبة تضم مكتب ضخمة على الجدران الأربعة للغرفة و بها مكتب متوسط الحجم وضع
عليها طبق متوسط الحجم به دماء وبجانبه كتاب ضخم ذو غلاف جلدي سميك وأوراقه من
الجلد الرفيع وعلبة مشارط طبية وعدة بخاخات صغيرة

يقف الأصدقاء ملتفين حول المكتب

ويبدو ان هناك شيء ما سبق ما سيحدث الان لم نراه

يمد طارق يده ليمسك المشروط ويجرح طارق أبهامه وينقط دمه داخل الطبق

ينظر طارق إلى مدحت الذي يمد يده هو الآخر ليأخذ مشروط من العلبة ويجرح أبهامه وينقط
دمه داخل الطبق

تقف كل من نور ونهال متمسرتان في مكانهما فتمد نهال يدها إلى مدحت الذي يمسك مشرط ويجرح إبهامها وتبدأ في تنقيط دمها داخل الطبق

تنظر الجميع إلى اميرة التي تنظر إليهم بتردد

يمد طارق يده إلى بخاخة بنج ويمسكها ويرش بها على إبهام اميرة ثم يمسك مشرط ويجرح بها إبهامها وينقط دمها داخل الطبق

يمسك رأفت مشرط ويجرح به أصابعه وينقط به داخل الطبق

رأفت :

كده تمام

يفتح رأفت الكتاب الجلدي ويخرج من ريشة كتابه ويضعها في طبق الدم

يبدأ رأفت في إلقاء التعويذة عدة مرات وفجأة ينقطع النور

تصرخ نور مفزوعة

صوت طارق :

اهدي يا نور .. رأفت النور متعود انه يتقطع
؟؟

لا يأتيه رد

بحدة

صوت طارق :

رأفت .. بقولك النور متعود انه يتقطع

لا يأتيهم رد

يخرج مدحت من جيبه ولاعة ويشعل لهبها وينظروا جميعا على ضوءها إلى مكان رأفت فلا يجدوه واقفا

يشعل كل من طارق ولاعته ويتحرك هو ومدحت ليتجهوا إلى مكان رأفت فلا يجدوه ويجدوا الريشة واقعه على الارض

قطع

ليل داخلي

مشهد ١٥

فيلا رأفت - الهول

يقف كل مدحت وقد امسك ولاعة وأطلق لهبها ورفع يده بها عاليا بينما تقفا نورو اميرة ونهال متوترتين

يضاء النور فيطفنوا الولاعات بينما يخرج طارق من الطريقة المؤدية إلى المطبخ يقف طارق على مقربة منهم

طارق :
هنوزع نفسنا على الفيلا.. وان شاء الله
هنلاقيه .. أنا متأكد انه مقلب من مقالبه

اميرة :
أنا بقول كده برده

نور:
مقلب أيه .. الاوضة ما فهاش إلا باب واحد
وكان ورانا .. هيخرج منين

طارق:
مش وقته.. أنا ومدحت في الروف .. نهال
واميرة في اوض النوم .. ونور هنا

يتحرك الجميع بسرعة

قطع

ليل - داخلي

مشهد ١٦

فيلا رافت - سطح الفيلا

يتفحص طارق ومدحت السطح

يأتيهما صوت صرخات نسائية، فيجريا بسرعة تجاه الباب

قطع

ليل - داخلي

مشهد ١٧

فيلا رافت - غرفة النوم

يرقد رافت على الأرض غارقا في دمانه

تقف كل من نهال واميرة على عتبة الباب يرتجفان من الرعب والدموع تنهمر من عيونهما
يصل طارق ومدحت إلى الغرفة، فينظرا الجثة برعب بينما يندفع طارق إلى الجثة ليحس
نبضها

تصل نور الى الغرفة فتتظر إلى طارق وهو يحس نبض جثة رافت الغارق في دمانه
يرتجف جسد طارق وهو يدير لهم وجهه وقد انسالت دموع من عينيه

طارق :
رافت مات

يغلق باب الغرفة بعنف

يدير الجميع رؤوسهم لينظروا إلى الباب بينما يتجه إليه مدحت ويحاول فتحه بعنف فلا يستجيب، فجأة يتهم زجاج النوافذ والتسريحة وأبواب الدولا

يتراجع الجميع ويلتحموا ببعض بينما يبدووا جميعا في الصراخ الهستيرى

اميرة :

أعوذ بالله من الشيطان الرجيم .. أعوذ بالله
من الشيطان الرجيم

بفرع وهسترية وهي تحتضنه

نهال :

مدحت طلعي من هنا يا مدحت

يعتدل رأفت لينظر لهم جميعا فتصرخ اميرة فزعا بينما ينظر له الجميع برعب يشوبه شيء من
الدهشة إلا طارق الذي تتسلل إلى شفثيه ابتسامة

رأفت :

مدحت طلعي من هنا يا مدحت

تنظر نور ابتسامة طارق ثم يقفز إلى رأفت الذي جلس على الأرض ينظر لهم بانتصار
محتدة

نور :

انتوا الأثنين أسخف من بعض .. كان لازم
افهم إن في حاجة غلط من أول ما بدأت
تعارضه

تنظر اميرة إلى ما يحدث بعدم فهم بينما تصيح نهال بغضب وهي تمسح دموعها

نهال :

إلا كده بجد ده تهريج سخيف

ينفجر كل من طارق ورأفت ضاحكين

ينظر مدحت إلى نهال واميرة وهو يخلع حزامه

مدحت:

نهال .. نور .. ع الباب .. ما حدش يخرج

يتجه مدحت الى رأفت وطارق الواقفان بجوار بعضهما وعلى وجهيهما ابتسامة

رأفت :

لا لا .. بطل تهريج .. حزمة لأ

يتقدم مدحت

مدحت :
هنتقربوا يعني هنتقربوا .. بحق ما كننوا
هتخلوا فضيحة ظابط بجلاجل وهو عاملها
على نفسه .. هنتقربوا

بيدا رافت في ضربهم بينما تضحك كل من نهال ونور واميرة

قطع

ليل - داخلي

مشهد ١٨

فيلا رافت - الهول

يجلس الأصدقاء السرة يضحكون بشده

نهال :
الله يخرّب بيتك كان قلبي هيقف والله
مدحت: بس لعبتوها صح ...

وهو يشير إلى طارق

مدحت :
.. والسمن ده هو اللي خلاها تدخل علينا في
الأول

نور :
أنا برده كنت مستغربت من معارضة طارق ..
طارق مش معارض بطبعه.. أتريه عشان ما
حدش يعارض غيره وتبوظ اللعبة

مبتسما

طارق :
بس أيه راكوا في الإخراج

يضحك الجميع
وهي تنتظر إلى ساعتها

اميرة :
مش ياللاه بقي .. أنا أتأخرت

ينهض الجميع فينظر لهم رافت بضيق

رافت :
ليه كده.. ما تخليكوأ شوية

قطع

مشهد ١٩

ليل-خارجي

فيلا رافت - حديقة الفيلا

يقف رافت أمام باب الفيلا يتابعهم بضيق وهم يمشون ويتهدد ويدخل الى الفيلا

قطع

مشهد ٢٠

ليل-داخلي

فيلا رافت - الهول

يستند رافت على باب الفيلا ويظل ينظر إلى الفيلا الممتلئة بالاثاث والخالية من البشر ثم ينظر إلى ساعته متهددا

رافت :

لسة بدري

ويتجه إلى غرفة المكتب

قطع

مشهد ٢١

نهاية الفلاش باك

ليل- داخلي

فيلا رافت - غرفة المكتبة

يمسك رافت الكتاب الجلدي ويبتسم بشده وهو يحمله ليضعه في المكتبة

رافت:

خليك أنت هنا بقى تذكرك

يتجه رافت إلى المكتب الموضوع عليه طبق الدماء فيجده خالي فينظر رافت إلى الأرض فلا يجد اثر للدماء عليها مستغربا

رافت :

ما اتفقتش معايا عليها دي يا طارق

يمط شفتيه ويحمل الطبق ويخرج

يسقط من كعب الكتاب الجلدي نقطة دم على الأرض

قطع

مشهد ٢٢

نهار-خارجي

مخرج المطار

يكتب على الشاشة يونيو ٢٠٠٩ بينما تخرج رنا فتاة في السابعة عشر من عمرها وتحاول ان توقف تاكسي

قطع

مشهد ٢٣

نهار-داخلي

فندق الاستقبال

تأخذ رنا مفتاح الغرفة من مظف الاستقبال وتنتجه الى المصعد

قطع

مشهد ٢٤

نهار-داخلي

غرفة رنا

تضع رنا حقيبتها على الفراش وتفتحها لتخرج الكتاب الجلدي منها وتجلس على الفراش وتفتحه
لنجد مكتوب بداخله بلون احمر قاني

قطع

مشهد ٢٥

نهار-خارجي

شارع

يخرج امجد رأفت - شاب في السابعة عشر - من بوابة النادي ويفتح سيارته وينطلق بها فجأة
يجد رنا واقفة في طريقه فيحاول ان يفرمل ويتجاوزها ولكنه لا يستطيع فيصدمها فتسقط ارضا
فينزل بسرعة من السيارة مفزوعا

امجد :

SHIT انتي طلعتيلي منين ؟

يتجمهر الناس فيبدو على امجد الذعر فيتصل باحد الارقام على هاتفه المحمول فلا يأتيه رد

قطع

مشهد ٢٦

نهار-داخلي

فيلا رأفت - غرفة اميرة

نرى هاتف اميرة المحمول يرن باسم امجد على الوضع الصامت بينما تقف هي على بعد تعدل
من مكياجها فيفتح الباب ويدخل رأفت على كرسيه المتحرك

رأفت :

لابسة من بدري ليه ؟.. انتي خارجة ؟

اميرة :

بدري من عمرك .. كلها شوية والناس هتبدأ

تيجي

ينظر رأفت الى الفستان العاري

رأفت :

مش كبرت شوية على الفستان ده ؟

اميرة :
والله موديلات DIOR كلها السنة دي كده ..
روح انت قولهم ما تنزلوش فساتين عريانة
عشان مراتي عجزت .. بس ابقى اخذك
ممرضة عشان تزقك الكرسي

رأفت :
وهو لازم DIOR الله يرحم سيدناوي

تستدير له بغضب

اميرة :
بطل الاسلوب السوقي ده

رأفت :
سوقي؟؟.. الله يرحم امبابة برضه

تقترب منه اميرة وتربت على كتفه

اميرة :
لو على الحاجات اللي ماتت ولازم ربنا
يرحمها .. قبلش انت يا رأفت.... وخلينا
نقضي ليلة حلوة .. ياللا يا حبيبي روح غير

ينظر لها رأفت باشمزاز ثم يتركها ويخرج

قطع

نهارداخلي

مشهد ٢٧

فيلا رأفت - ممر

يمشي رأفت على كرسيه المتحرك في الممر ثم يخرج هاتفه المحمول فيجد ٧ مكالمات فانتة
ورسالة وارده فيفتح الاتصالات فيجدها كلها من ابنه امجد فيفتح الرسالة فيجدها من رقم مجهول
ومكتوب فيها ٧ اكتوبر فيبدو عليه الاضطراب بشدة ويمشي بسرعه تجاه مدخل غرفته

قطع

نهارداخلي

مشهد ٢٨

مستشفى - ممر

يقف امجد امام الطبيب

امجد :
بليز يا دكتور .. بدل ما هي كويسة .. انا ما
بقولكش ما تبلعش انا بقول لحضرتك بليز
اصبر لغاية ما حد من اهلي يرد

الدكتور :

ما اقدرش انت قاصر .. وهي اه كويسة بس
دراعاها مكسور ..لازم ابغ

امجد :

انا ما بحبش الاسلوب ده بس مضطر .. ولو
قولتلك اني امجد رأفت هجرس .. ابن صاحب
المستشفى دي ؟

الدكتور :

انت ابن مدام اميرة وبشمنهندس رأفت

امجد :

ايوة انا ابن اميرة هانم ورأفت باشا .. خلاص
طبعا دلوقتي تقدر تصبر

تتجه احدى الممرضات الى امجد

الممرضة :

المصابة عايزاك

امجد :

انا ؟

قطع

نهار-داخلي

مشهد ٢٩

فيلا رأفت - غرفة نومه

يجلس رأفت على كرسيه يطلب الرقم الذي ارسل له الرسالة فيجده مغلق فيفكر قليلا ثم يتصل
بأحدهم

رأفت :

ايوة يا ياسر .. كل سنة وانت طيب .. المهم
انا هبعثلك رقم دلوقتي .. عايز اعرف مين
صاحبه وفيين عنوانه حالا .. سلام

يغلق رأفت الهاتف ليرسل رساله ثم يعود ليفتح الرسالة التي استلمها وينظر الى الشاشة
المكتوب عليها ٧ اكتوبر ١٩٩٦

قطع

نهار-داخلي

مشهد ٣٠

مستشفى - غرفة

يجلس امجد امام رنا النائمة على الفراش

امجد :
انا اسف جدا .. انا ماكنش قصدي اخبطك

نتكلم رنا بلهجة اوروبية واضحة

رنا :
ما انا عارفة انا اللي رميت نفسي قصااك

امجد :
وليه كده ؟

رنا :
كنت محتاجة اتكلم معاك .. وعارفه انك
منعزل شوية .. والنهارده كمان مش فاضي
عشان الحفلة

امجد :
وكمان عارفه بالحفلة

رنا :
انا اعرف حاجات كتير عنك

مبتسما

امجد :
زي ايه مثلا ؟

رنا :
تعرف مثلا انت ان عندك اخوات

امجد :
انا ما عنديش اخوات

رنا :
لا عندك .. انا اختك

قطع

ليل- داخلي

بداية الفلاش باك

مشهد ٣١

فيلا رافت - غرفة المكتبة

نرى المكتبة الموضوع بها الكتاب الجلدي ويكتب على الشاشة فبراير ١٩٨٦ بينما يسقط من
كعب الكتاب الجلدي نقطة دم على الأرض

قطع

طريق

يسير طارق بجوار اميرة

اميرة :

ورأفت خرج أزاى من الاوضة

مبتسما

طارق :

الفيلا مليانة سراديب .. انتي عارفة كل الفيل
القديمة كده

مبتسمة

اميرة :

مجنون رأفت

ينظر لها طارق

طارق :

هتكملي معاه يا اميرة ؟

تبعد اميرة نظرها عنه وتتنظر الى الشارع بشرود

بصوت خفيض

اميرة :

اكيد يا طارق.. لو مش هكمل هرفض مع
بعض ليه ؟

تخرج من شرودها وتتنظر إليه

اميرة :

طارق .. احنا متفقين على ايه ؟

طارق:

اننا نسكت

مبتسمة

اميرة :

بس انت بتتكلم اهو مش ساكت

طارق :

هسكت يا اميرة

اميرة:

هتعمل ايه بعد ما السنة تخلص ؟

طارق :

احنا لسه في فبراير يا اميرة انتي كمان

اميرة :
يعني ما بتفكرش ؟

طارق :
بفكر ... و نفسي يسبونني في البيت ادخل
معهد سينما

تبتسم اميرة وهي تقف امام احد المحطات

اميرة
: بتهيا لي انت هتبقى اول مخرج دارس
شريعته

تبتسم طارق وهو ينظر اليها

اميرة :
تصبح على خير

يمسك طارق يدها فتلتفت لتتنظر إليه

طارق :
هتوحشيني

تسحب يدها منه برفقه

اميرة :
ما انا هشوفك بكره عند رافت

يفهم طارق تلميحها فيبدو على عينيه الحزن

اميرة :
الاتوبيس جه .. سلام

قطع

ليل- داخلي

مشهد ٣٣

فيلا رافت - غرفة المكتبة

نرى المكتبة الموضوع بها الكتاب الجلدي بينما يسقط من كعب الكتاب الجلدي نقطة دم على الأرض

قطع

ليل - داخلي

مشهد ٣٤

شقة مدحت - الصالة

تدخل نهال إلى الشقة بينما يغلق مدحت الباب في هدوء

تستدير نهال لتواجهه

نهال :
أنت من أمتى بتتكلم معايا بالطريقة دي ؟

بغضب

مدحت :
من هنا ورايح عشان أنا خلاص زهقت من
عدم إحساسك بوجودي .. وأنا عايز افهم ؟ ..
أحنا اللي بيئا ده اسمه ايه ؟ .. انتي بتحبيني
ولا بتحبي طارق

بمنتهى الهدوء

نهال :
هجاوبك يا مدحت .. بس أنت كمان تجاوبني
نور كانت بتعمل عندك ايه هنا الساعة ؟
الصباح

مدحت :
بتعمل ايه يعني .. صاحبة العمارة مش عايزة
تدخلها .. ومعهاش فلوس تروح فندق .

نهال :
فجت اللوكندة .. ما اصل انت مصاحب
قرطاس

مدحت :
ما بلاش تلقيح .. عشان لو ابتديناه مش
هنخلص

نهال :
لا والنبي سمعنى دررك

يتجه مدحت بمنتهى الهدوء إلى غرفة المكتب ويدخلها ويعود منها وهو يحمل مجموعه أوراق
مصورة

يقف أمامها ويقرأ

مدحت :
ما زلت لا اعرف هل أسأت الاختيار
بالارتباط من مدحت .. وما دمت لم ارتبط
بالشخص الذي عشقه قلبي لماذا ارتبطت
بالاختيار الأسوأ

وهو يرمي الورق أرضا

وقد بدا صوته مشروخا

مدحت :

ها يا هاتم ياللي بتتكلمي عن القراطيس أكمل
ولا عارفه الباقي

تبدوا نهال مرتبكة وهي تنظر إلى الورق المرمي على الأرض ثم تستجمع أعصابها وتتنظر له
بغضب

نهال :

شغل الطباط بيمشي في دمك بتتجسس عليا
وبتقرا مذكراتي .. بس لو أنت هتبقى طابط
أنا برضه هبقى صحفية

تتجه نهال إلى غرفة المكتب وتعود منها ومعها صندوق صغير به شرائط كاسيت تخرج الأول
وترميه به

نهال :

ده أيام ما كان عندك حمى اسمعه وشوف
قايل أيه

تخرج الثاني وترميه به

نهال :

وده أيام ما كنت ماشي مع بنت خالتك اللي
الست والدتك كانت عايزه تجوز هالك اول ما
تتخرج

تخرج الثالث

نهال :

وده أيام ما كنت مرافق البت بتاعت مساكن
الشيرتون

ترمي الباقي في وجهه

نهال :

والباقي مع مومساتك اللي بتشقطنهم بالدبورة
اسمعهم كده وأتكيف.. وبعد كده نبقي نقعد
نحاسب بعض

يصفها مدحت بعرف

تضع نهال يدها على خدها المضروب وتتنظر له بغضب ثم تتجه إلى المطبخ وتعود حاملة
سكين تلوح به في وجه مدحت

بغضب

نهال :
اقسم بالله العظيم .. لو مديت أيدك عليا ثاني
هشرك

قطع

مشهد ٣٥

ليل- داخلي

فيلا رافت - غرفة المكتبة

نرى المكتبة الموضوع بها الكتاب الجلدي بينما يسقط من كعب الكتاب الجلدي نقطة دم على الأرض

قطع

مشهد ٣٦

ليل-خارجي

فيلا رافت - حديقة الفيلا

تقف نور امام باب الفيلا بينما يفتح رافت الذي يبدو عليه اثر النوم فينظر الى ساعته

رافت :
نسيتي حاجة ولا صاحبة العمارة برضه ؟

نور :
تقدر تقول الاتنين .. ايه مش هتدخلني

ينظر رافت الي عينيها ويبتسم بجانب فمه

رافت :
واسيبك تنامي في الشارع يعني .. ما تهونيش
عليا

قطع

مشهد ٣٧

ليل- داخلي

فيلا رافت - غرفة المكتبة

نرى المكتبة الموضوع بها الكتاب الجلدي بينما يسقط من كعب الكتاب الجلدي نقطة دم على الأرض

قطع

مشهد ٣٨

ليل-داخلي

شقة طارق - غرفة النوم

يرن جرس الباب فينهض طارق من النوم متبرما

ينظر إلى ساعته التي جاوزت عقاربها الواحدة

فينهض متجها إلى الباب وهو ينفخ بتأفف

قطع

مشهد ٣٩

ليل داخلي

شقة طارق - الصالة

يفتح طارق الباب ليجد مدحت واقفا أمامه

مستغربا

طارق :

ايه ده يا مدحت ده .. انا مش رافت ... ابويا
وامي مسافرين على طول عشان تجيلي في
نص الليل كده

وهو يدخل

مدحت :

معلش يا طارق مخنوق ومحتاج احكي مع
حد .. ده غير اني عارف ان عم يحي في
القسم

طارق :

طب ادخل

يجلسا

طارق :

في ايه ؟

مدحت :

خناقة بسيطة كده مع نهال .. في مشكله لو
بت معاك

وهو يشير إلى الشقة

طارق :

الشقة تحت أمرك .. بس هو انت لما تتخانق
مع نهال تسبب بيتكوا ليه .. انتوا متجوزين يا
مدحت من ورانا

مدحت :

متجوزين ايه بس يا طارق انت كمان .. انا
روحتها ولو قعدت لوحدي كنت هتخنق
واكيد مش هروح لرافت .. عايز احكي

متنهدا

طارق :

ماشى يا مدحت .. بس من غير لت

وهو يتجه إلى المطبخ

مدحت :
هجيب حاجة نشربها بس

بحنق

طارق : الليلة جميلة .. هتقلبهالي غم يا
مدحت

يعود مدحت وفي يده كوبين كوكاكولا يعطي احدهما لطارق ويجلس على احد كراسي الانتريه
فيجلس طارق هو الآخر على الكرسي المواجه له ويشرب ما بالكوب ثم يشير به فارغا إلى
مدحت

طارق:
احكي يا مدحت

قطع

ليل- داخلي

مشهد ٤٠

فيلا رافت - غرفة المكتبة

نرى المكتبة الموضوع بها الكتاب الجلدي بينما يسقط من كعب الكتاب الجلدي نقطة دم على
الأرض

قطع

ليل - داخلي

نهاية الفلاش باك

مشهد ٤١

شقة نهال - غرفة نهال

نرى نهال راقدة على فراشها غارقة في دمانها

قطع

ليل-خارجي

مشهد ٤٢

مخرج المطار

يكتب على الشاشة يونيو ٢٠٠٩ بينما تخرج نهال سماحة من المطار

قطع

ليل-خارجي

مشهد ٤٣

فيلا رافت - حديقة الفيلا

نرى الحفلة وقد بدأت ويقف ال dj يدير الاغاني وقد وضع اغنية لتامر حسني فنرى رافت
يتجه اليه بكرسيه المتحرك ويقف بجواره ويشير له ليقترب منه فيحنني الرجل مستائلا

رافت :
انت تعرف انا مين

الرجل :
لا يا افندم

رأفت :
انا اللي بدفعلك .. وبسهولة قوي ممكن امشيك
.. ال list اللي الهانم تدهالك تنساها وتشغل
ال list اللي هقولك عليها

الراجل :
حاضر يا افندم

يبتعد رأفت على كرسية فيعتدل الرجل ليتحدث مع زميله

الرجل ١:
ايه الهيافة دي ؟

الرجل ٢:
انت جديد اول سنة .. طب ده السنة دي
بيتخافوا على حاجة ممكن نفهمها .. ما
حضرتش انت السنة اللي كانوا عاملين فيها
حفلة تنكرية .. وهو راسه والف سيف ..
يلبس Donald duck وهي راسها والف
سيف تلبسه bugs bunny

الرجل ١:
وبيحبوا وقت منين يعملوا فلوس الناس دي
لما هم بيتخافوا على الهيافات كده

الرجل ٢:
اللي عامل عمل زمان يا عم .. شغله الليسته
بتاعته

يدير الرجل اغنية " بعدت ليه " لعمر و دياب

يدخل طارق يحيي الحفلة وقد بدا في قمة الشياكة وينظر الى الجموع بابتسام ثم يلح رأفت
على بعد على كرسية فيبتسم ويتجه اليه بهدوء بينما رأفت منشغل بالحديث مع احد الاشخاص
وصوت عمرو دياب في الخلفية

يقف طارق خلف رأفت

طارق :
كل سنة وانت طيب يا رأفت

يبدو على وجه رأفت الاستغراب وكأنه مستغرب الصوت ثم يستدير بالكروسي ليرفع عينه الى
طارق فيزاد استغرابه

رأفت :
طارق ؟

يخرج طارق من رد فعل رأفت فيلاحظ رأفت هذا فيحاول ان يخلصه من احراج

رأفت :
الله يبارك فيك

ثم ينظر الى الواقفين معه

رأفت :
عن انكروا

يتحرك رأفت وطارق مبتعدين

طارق :
مش عارف ليه يا رأفت حاسس انك متفاجئ
انك شوفيتي

رأفت :
مش عملية مفاجأة بس مش متوقع

طارق :
ليه مش انت اللي بعثلي ال invitation ؟

رأفت :
الصرامة لا ؟ .. اكيد اميرة

تقف اميرة على بعد وقد تسمرت في مكانها وتهمس

اميرة :
طارق ؟

ثم تتحرك ببطئ اليهما لتقف معهما وتمد يدها الى طارق

اميرة :
ازيك يا طارق

طارق :
الله يسلمك يا اميرة .. كل سنة وانت طيبة

اميرة :
ميرسي .. هستاذنك في رأفت دقائق

قطع

فيلا رأفت - غرفة المكتب

تقف اميرة امام رأفت محتدة

اميرة :

انت ازاي تعزمه .. احنا مش قافلنا الصفحة
دي من حياتنا .. بتفتاحها ليه
رأفت : انا ما عزموش .. انا قولت انتي اللي
عزمتيه

اميرة :

يعني ايه ؟ .. ال invitation طارت
وراحتله ؟

رأفت :

أسألي نفسك .. مين فينا اللي كان من كام يوم
بيحلم بيه .. وبيقول اسمه وهو نايم

قطع

فيلا رأفت - حديقة الفيلا

يقف طارق وحيدا يتابع الحفلة بينما يقترب منه مدحت

مدحت :

ده انت كمان معزوم

يلتفت طارق الى مدحت ويظل ينظر الى عينيه قليلا

طارق :

ازيك

مدحت :

زي ما انت شايف .. زي الفل

طارق :

طب والله كويس ... انت معزوم ولا جاي
تقبض على حد

ينظر له مدحت بحنق

مدحت :

انا شغال ادا ب .. بقبض على الناس ع
السراير .. مش في الحفلات

يقترب رأفت منهما وقد بدا عليه عدم الاستيعاب

رأفت :
ازيك يا مدحت

يبتسم مدحت عند رؤيته لرأفت وينحني ليقبله

مدحت :
الحمد لله ازيك انت؟ .

رأفت :
انا مبسوط اني شوفتك النهارده

مدحت :
كويس انك لسه فاكّر .. ان ليك صاحب

يضحك طارق ضحكة قصيرة ساخرة

طارق :
مش رأفت اللي بعثنا ال invitations

ينظر مدحت الى رأفت باستغراب

مدحت :
امال مين ؟

قطع

مشهد ٤٦

ليل داخلي

فيلا رأفت - غرفة المكتب

تقف اميرة وقد بدا عليها الاضطراب الشديد ثم تنتبه الى شيء

اميرة :
امجد .. اكيد هو

تتنظر حولها كأنها تبحث عن شيء ثم تسمع هرج ومرج في يأتي من الخارج فتتجه الى احدى النوافذ لتتنظر من خلالها فتجد الكثير من رواد الحفلة يسلمون على نور فتتنظر اميرة الى ما يحدث بعدم تصديق

قطع

فيلا رأفت - حديقة الفيلا

تقف نور مع بعض رواد الحفلة وقد ارتدت فستان مثير للغاية وتبتسم برقه الى كل من يحدثها بينما تلمح على بعد كل من مدحت وطارق ورأفت فتتجه اليهم وهي مبتسمة ابتسامة واسعة

نور :

والله يا زمن يا مضاريب .. ايه اللي فكرك
تاني بينا يا رأفت .. مش اخر خناقة قولنا ..
مش عايزين نشوف حلقة بعض تاني

تقف خلفها اميرة

اميرة :

طب بدل ما انتي عارفة كده .. ايه اللي جابك

يمر احد الخدم وهم يحملون كؤوس خمر فتناول نور كأس وتشربه وهي تنتظر اليهم

نور :

عشان لو انتي اللي باعته ال
invitation افرس رأفت ولو رأفت اللي
باعتها .. افرسك

رأفت :

ولو مش حد فينا اللي باعتها

نور :

افرسكوا انتوا الاتنين

يضحك مدحت بصوت عالي

طارق :

انا مش فاهم حاجة .. يعني ايه مش حد فيكوا
اللي باعتها

رأفت :

يعني لا انا ولا اميرة اللي باعتناهم

مدحت :

امال مين يعني

يقرب احد الخدم من اميرة ويعطيها الهاتف

اميرة :

اكيد امجد .. وهفهم منه ليه دلوقتي

طارق :
طب انا هستاذنكوا بقي .. انا لو اعرف ان
انتوا اللي مش باعتنھا ما كنتش جيت

تنظر اميرة الى هاتفها المحمول فتجد اكثر من ٢٠ اتصال فلفت من امجد فتتحرك بينما تمسك
نور يد طارق

نور :
خليك قاعد .. هنضحك شوية

يزيح يدها في هدوء

نور :
في ايه .. متوضي ؟

طارق :
نور .. انا كنت بحسب ان انا معزوم بس ..
لكن لمتنا مالهاش لازمة .. عشان ما يبجيش
من وراها الا المصايب

يتركها ويمشي فتمشي خلفه

نور :
طارق .. طارق

تتحدث اميرة في هاتفها المحمول

اميرة :
مستشفى ايه وحادثه ايه انا مش فاهمه حاجة
.. انا هجيلك حالا

تتجه اميرة الى رأفت الواقف مع مدحت

اميرة :
امجد في مشكلة .. خد بالك من الحفلة ولو
حد سأل عليا انا موجودة ..

تمشي بسرعه اميرة مبتعدة تاركة رأفت ومدحت وحدهما فيتنهد رأفت وهو ينظر الى مدحت

رأفت :
انا عارف كلنا ليه ما بنتقبلش .. ما عادا انت
يا مدحت .. دايم كنت عايز اسالك بعدت ليه
؟

مدحت :
عشان اليوم اللي محاسب فيه اميرة .. ما
تجيش تقولي ازاى

يتركه مدحت ويتجه الى باب الخروج

قطع

ليل خارجي

مشهد ٤٨

فيلا رافت - جراج

تمشي نور خلف طارق المتجه الى سيارته

نور :
طارق .. ما يصحش كده

يلتفت اليها طارق

طارق:
عايزة ايه يا نور

نور :
في ايه يا طارق واحشني وعايزة اقعد معاك

طارق :
شكرا .. انتي مش وحشاني .. ومش فاضي
اقعد مع حد

نور :
يا طارق انت عارف انا بعزك قد ايه

طارق :
نور .. ما فيش كاميرات بتصور يا ماما ..
اطلعي من دور الملاك ده مش عليا

تتنمر ملامح نور وكأنها تبدلت تماما

نور :
هو انا بس اللي بقف قدام كاميرات امثل يا
شيخنا

طارق :
لاااااااااااا .. ابعد من خيالك انك تقارني بيني
وبينك .. لان ما فيش اي ارتباط .. بين اللي
بيقلع الناس ويلبسهم

تضحك نور ضحكة رقيقة

نور :

لا في وحياتك .. الاتنين بيشتغلوا عند نفس
صاحب مصنع الهدوم . انا اقلع وانت تلبس ..
عشان هو يبيع .. الفرق بس انك بقيت مصدق
نفسك قوي

طارق : هتفضلني طول عمرك زي ما انتي ..
اخلاق عوالم

نور :

على الاقل انا عالمة من يومي .. شوف بقي
انت كنت ايه وبقيت ايه

يهم طارق بالرد فتصله رساله على هاتفه المحمول فيخرجه ليقرأها فيبدو عليه الدهشة وهو
ينظر الى نور

طارق :

ايه الرساله الغريبة دي ؟

يناولها الهاتف للتعرف الرسالة فنرى مكتوب على الشاشة " ما تمشي من الح فلق ١٩ نوفمبر
١٩٨٩

قطع

ليل خارجي

مشهد ٤٩

سيارة مدحت

يقود مدحت سيارته فتصل الى هاتفه المحمول رسالة فيفتحها ليجد بداخلها مكتوب " مشيت ليه
٧ يونيو ١٩٩٢ " يفرمل مدحت السيارة ويلف بها بسرعه

قطع

ليل داخلي

مشهد ٥٠

مستشفى - ممر

تحتضن اميرة امجد

اميرة :

انا مش فاهمه اي حاجة

امجد :

زي ما بقولك كده .. بتقول انها اختي

اميرة :
اخذتك ازاي يعني .. دي اكيد مجنونة

امجد :
انا بقلك اللي قالته ولما قولتها ازاي .. قالتلي
اسأل مامتك .

اميرة :
هي فين ؟

قطع

مشهد ٥١

ليل-داخلي

مستشفى - غرفة

يقف امجد واميرة ينظرا الى الغرفة الخالية فتنظر له اميرة

امجد :
الحمد لله .. انها متقيدة في كشوف المستشفى
.. ولا كنتي هتقولي عليا مجنون زي العادة

تتنهد اميرة وتحيطه بذراعها بحب وهي تنظر الى الفراش الخالي والذي يبدو انه كان يرقد عليه
احدهم

قطع

مشهد ٥٢

ليل-خارجي

فيلا رأفت - حديقة الفيلا

يتجه مدحت الى نور وطارق الذين وقفا يبدو عليهما الاضطراب

مدحت :
انتوا ايه اللي رجعكوا ؟

نور :
واضح انه اللي رجعك

يتنقل مدحت بعينه بين عيونهم ثم يعتدل ليقف بجوارهما ويظلا الثلاثة يتابعون بعينهم الحفلة

قطع

مشهد ٥٣

ليل-خارجي

سيارة اميرة

تقود اميرة سيارتها وبجوارها يجلس امجد

اميرة :
انت بعت دعاوي لحد غير صحابك ؟

امجد :
انا ما بعثش حتى لصحابي

اميرة :
متأكد ؟

امجد :
انا هكذب ليه

يبدو على اميرة الاستغراب الشديد وتنطلق بسرعه بالسيارة

قطع

ليل داخلي

مشهد ٥٤

فيلا رأفت - الهول

يدخل كل من اميرة الى الفيلا فيتجه امجد الى الدور العلوي بسرعه

اميرة :
غير بسرعه

امجد :
حاضر

يقترّب احد الخدم من اميرة

الخدم :
في واحدة مستنية حضرتك في اوضة المكتب

اميرة :
من الحفلة ؟

الخدم :
لا يا هانم .. ما عهاش دعوة .. واصرت انها
لازم تقابلك

اميرة :
اسمها ايه ؟

الخدم :
ما رضتش تقول

قطع

مشهد ٥٥

ليل داخلي

فيلا رافت - غرفة المكتب

تجلس نهال مضطربة امام المكتب وقد بدا عليها انها تكره تلك الغرفة بشدة فتفتح اميرة باب الغرفة لتدخل فتجد نهال بداخلها فيبدو عليها الفزع فتدخل وتغلق الباب خلفها بسرعه

اميرة :

انتي بتهريجي ولا اتجننتي .. ولا هتقوليلي
انتي كمان اتبعثلك دعوة

قطع

مشهد ٥٦

ليل خارجي

فيلا رافت - حديقة الفيلا

يجلس رافت على كرسيه ومعه بعض المدعوين فتصله رساله على هاتفه المحمول فيفتحها ليجده نفس الرقم الغامض ارسل له رساله ومكتوب فيها " لازم تكون في اوضة المكتب دلوقتي "

يحاول رافت الاتصال بالرقم بسرعه فيجده مغلق فيبدو عليه التعصب ثم ينظر الى المدعوين

رافت :

عن اذنكوا

في الخلفية نسمع اغنية بعدت ليه لعمر دياب بينما يبتعد رافت

قطع

مشهد ٥٧

ليل داخلي

فيلا رافت - غرفة المكتب

يأتي من الخارج صدى صوت اغنية بعدت ليه لعمر دياب

اميرة :

انتي مجي كده ممكن يهد كل حاجة ..
والمصيبة ان كلهم هنا

نهال :

انتي مش فاهمة حاجة .. اصبري عشان
افهمك

قطع

مشهد ٥٨

ليل خارجي

فيلا رافت - حديقة الفيلا

يقف الثلاثة ينظرون الى رافت وهو يبتعد وفي الخلفية يغني عمرو دياب " بعدت ليه "

تصل رسالة الى هاوتفهم الثلاثة فيفتحوا الرسالة ليح دوا مكتوب بداخلها لكل منهم " امشي ورا رافت "

قطع

ليل-داخلي

مشهد ٥٩

فيلا رافت - غرفة المكتب

ترمي اميرة نفسها على كرسي امام نهال ومازال صدى صوت عمرو دياب في الخلفية

اميرة :

عرفت كل حاجة ؟

قطع

ليل-داخلي

مشهد ٦٠

فيلا رافت - ممر

يدير رافت في الممر على كرسيه وفي الخلفية صدى صوت اغنية بعدت ليه بينما يدخل خلفه كل من نور ومدحت وطارق

قطع

ليل-داخلي

مشهد ٦١

فيلا رافت - غرفة المكتب

في الخلفية نسمع صوا غنية بعدت ليه بينما تنتظر اميرة الى نهال

اميرة :

يعني هي اللي كانت في المستشفى النهارده ؟

فجأة تنهض غاضبة

اميرة :

ازاي سبتها تعمل حاجة زي كده .. انتي

عارفة ده معناه ايه ؟

يفتح باب المكتب ليقف رافت بكرسيه على الباب ينظر لنهال مصدوما بينما يتبعه طارق ومدحت ونور الذين يقفوا ينظروا الى نهال بصدمة وفجأة ينقطع النور لتتوقف اغ نية عمرو دياب

يخرج كل من طارق ومدحت ورافت ولاعته ويشعلها ويوجهوا لهيبها الى نهال بعدم تصديق

مدحت :

يعني ايه ؟

ينظر رأفت الى اميرة

رأفت :

فهميني ايه اللي بيحصل ده ؟

طارق :

امال اللي دفناها دي كانت مين ؟

تنهض نهال بسرعه وتهم بالخروج فتمسكها نور من يدها

نور :

لا ما فيش حد هيخرج من هنا الا لما نفهم

تنهض اميرة وتتجه اليهما لتفك يد نهال من نور فتجري نهال

اميرة :

بلاش فضايح في ناس بره خليها تمشي

تجري نهال فيجري مدحت خلفها

قطع

ليل-خارجي

مشهد ٦٢

فيلا رأفت - جراج

تجري نهال تجاه السيارة الليموزين الموجود بداخلها السائق فيجري ورائها مدحت ويمسكها من يدها

مدحت :

بنتي فين ؟ يا نهال

قطع

ليل-داخلي

مشهد ٦٣

فيلا رأفت - غرفة المكتب

مازال النور مقطوع فيتحرك رأفت تجاه اميرة

رأفت :

من غير صوتي ما يعلا ومن غير خناق ..

مش هتخرجي من المكتب غير لما افهم ..

نهال عايشة ازاي ؟

قطع

فيلا رأفت - جراج

تتنظر نهال الى مدحت وتهتم بالتحدث فيرن هاتفها المحمول فتزد عليه

نهال :

الو .. اية يا رنا .. انتي فين .. في ايه ..
فهميني طب .. اهدي طب .. اديني العنوان

قطع

فيلا رأفت - غرفة المكتب

ترفع اميرة عينيها لتتنظر الى كل من رأفت ونور وطارق

نور :

اميرة .. انتي عارفه كويس قوي احنا بعدنا
ليه .. فما تتخيليش ان احنا هنسيبك ساكتة بعد
ما لقينا نهال طالعلنا من قبر الماض .. حيه

يرن هاتف رأفت المحمول فيرد عليه

رأفت :

ايوة يا ياسر .. باسمي انا ؟؟؟ والعنوان ..
ابعتهولي في رساله

وهو يرفع عينه لينظر لهم بدهشة

رأفت :

الرقم اللي بعثلي الرسائل .. باسمي انا .. بس
بعنوان في امبابة

اميرة :

امبابة ؟

نور :

يبقى يالا بينا كده بربطة المعلم زي ما احنا
على امبابة

قطع

فيلا رافت - جراج

يدخل امجد الى الجراج ينظر الى سيارة مدحت وهي تنطلق وداخلها مدحت ونهال وخلفها سيارة اميرة وهي بداخلها اميرة ورافت وخلفهما سيارة طارق وبداخلها طارق ونور فيستغ رب بشدة ويتجه الى سيارته ليركب ولكن عندما يفتحها يجد بداخلها الكتاب الجلدي الضخم فينظر له باستغراب ودهشة

قطع

امام منزل اميرة بأمامية

تركن الثلاث سيارات امام المنزل القديم ويقف امامه الست اصدقاء كل على قدميه ورافت على الكرسي ينظرون للمنزل باستغراب ثم يتجهون جميعا الى باب الدخول

قطع

امام شقة اميرة

يقف الستة امام الباب يطرقون على الباب فلا يرد عليهم احد فينظر مدحت الى اميرة فتتهز رأسها بالايجاب وكأنها فهمت نظرتهم

قطع

شقة اميرة - الصالة

يفتح الباب عنوة ويدخل مدحت ومن بعده يدخل الجميع الى الصالة التي يسودها الظالم الحالكة فيخرج طارق ومدحت ورافت ولاعتهم يطلقون شعلتها ليضيئوا بها الصالة ليقف الستة ينظرون الى جثة رنا التي القيت على الارض غارقة في دماؤها

نهاية الشعلة الاولى